

四庫全書

集部

欽定四庫全書

集部

絮齋集卷二十一

詳校官庶吉士

臣初喬齡

主事

臣呂雲棟覆勘

總校官編修

臣王燕緒

校對官中書

臣高中

謄錄監生

臣何照鄰

欽定四庫全書

絜齋集卷二十一

宋 袁燮 撰

誌銘

蔣安人潘氏墓誌銘

鄉友朝奉郎蔣君如晦嘉泰中為閩漕屬官之長時余亦為倉屬朝奉生長大家飲食衣服之奉宜與寒士不類而止以一子自隨主中饋護衣篝者咸不在余疑焉

請問其故朝奉曰吾婦之不來憚遠而止爾固嘗飾一婢以從我吾以為古者妻不在妾御莫敢當夕著在禮經此所以弗與俱也余于是歎曰賢哉君之夫婦婦人之不妬男子之無欲自古所難今君婦選擇妾媵奉承君子確乎無妒忌之行君亦恬淡自處不累于欲蕭然若山澤之癯可謂夫夫婦婦矣度越流俗豈不遠哉朝奉欣然曰是知我夫婦者一時士大夫備聞此論亦皆兩賢之朝奉之婦安人潘氏也諱妙靜故家濟南金據

中原父大宗正丞諱致祥與其兄郎中渡江南而寓四
明之小溪因卜居焉郎中使金庭不辱命以正論忤權
臣世高其節宗丞亦以才氣不羣有聞于時故論名族
者推潘氏安人自髫髻時端靜如成人年將及笄歸于
蔣氏時族之尊行不啻百數皆屬目視其所為既而人
人致敬禮無違者翕然譽之姑李氏莊簡公兄女也治
家有法度嚴不可犯事之盡禮歡然無間言近親孤幼
甚衆舅姑之無恙也實任撫育之責既歿克繼先志并

包兼容有求響答厚爾供億畢爾嫁娶無不意滿而資
用寢微矣多方搏節量入為出賴以均給焉朝奉天資
鯁亮以廉節自勵安人敬而承之同德一心冰清玉映
警策二子常以門戶為念誨女若婦具有規繩嫠居之
後備嘗艱阨者十五年日用幾不支矣而軫卹孤寡扶
助親黨無異于往時益勤益儉不資他人每曰吾與其
不足而有求孰若儉約而無求也可謂名言士大夫不
能忍窮猶貪求以飽其欲而閭閻中持論乃如此豈不

深可敬歟故家典型于是乎不墜矣兩該恩封嘉定十二年七月丁未疾卒壽七十有三歲十二月壬午葬于奉川溪口之原祔朝奉之窆子亢宗克家俱力學克家嘗兩預鄉舉長女適兵部侍郎趙汝述次適進士潘侯伯父郎中之孫也孫師佑岳老葬有日二子泣請銘余觀自昔論婦德者率以柔順為貴柔順信可貴也然有志操殊常不以柔順自足者尤為可貴是故無違夫子雖婦人之德而夙夜警戒乃相成之道豈徒柔順而

已哉安人之立身所可稱述者蓋如此固嘗學佛矣曉
其大義而不喜誦經或問之則曰直心道場佛亦如是
何以經為此達者之言也勒諸堅珉孰曰不宜于是敬
諾之銘曰謂一于柔兮堅正乃爾謂列于才兮家政則
理生于名門兮作配君子相觀而善兮宜爾具美門戶
之昌兮曷其有已

何夫人宣氏墓誌銘

詩稱無非無儀惟酒食是議此言婦人之職不過乎中

饋而止非若偉大夫經營于外以才能自表見也嗚呼
是則然矣不曰釐爾女士乎蓋所謂女士者女子而有
賢士之行也其識高其慮遠其于義理甚精而不移于
流俗閭閻楷模于是乎在豈獨惟中饋是供乎此詩所
以反復此義而余于宣氏夫人所以深有取也夫人諱
希真上世家太末高大父徙鄞故今為慶元鄞人曾祖
士隆贈太子太保祖贈太子太傅考與言贈太子太師
母史氏贈濟陽郡夫人故太師越忠定王之從妹也夫

人天資穎悟五六歲時聞讀書聲即歷歷成誦曾不待教長益聞爽篤于事親而達于世故宮師每以事咨之皆據理以對深奇愛之今樞密同知夫人之弟也自幼端粹不羣宮師曰此兒他日必大吾門顧吾老不及見爾夫人于是勉同知以務學無負于宮師所以期待者年二十歸于同郡何公懋之不及養舅姑而奉伯兄夫婦與舅姑等叔有童外者姑有未適人者皆依于夫人躬任其責彌縫順適成立而後止二子能言授以論語

孟子及長徙居城中擇精于教導者俾師事焉歸必叩
其學業而待其師禮敬甚備又以曲禮內則中庸大學
冠婚鄉飲諸篇時時為兒輩諷誦而開警之生理素微
而賓祭惟謹喜周人之急有告以寒不可耐者家止二
衾輟其一以畀之盜入其室篋胠無餘有司以責里正
不堪嚴急請代之輸何公以為非義質諸夫人夫人曰
如此則非我遭寇乃里正遭寇爾何公然之遂不復訴
科舉之士有得雋場屋又兼人以獲厚貲者頗自矜街

夫人曰士子當砥礪廉隅今嗜利無恥而不知其非又自以為能他日苟得一官豈不重為民害乎聞者深愧之衣冠之裔出贅既有子矣而厥婦亡夫黨以為未廟見也或尼其歸葬夫人曰納采問名已告其先矣婦之資裝夫必得之矣矧又有子乎申告于廟以義起禮于我乎葬可也卒如其說中年晨興誦道釋書一日慨然曰虛無之言誦之何益孰若吾聖經修身齊家之道具在其中乎觀程氏遺書則曰義理之同然者固如是嘗

夢人指其肩覺而肩痛家人以為疑夫人曰吾所以疾寒襲其膚也藥之而已又何疑焉既而果愈及其將歿也藥屢進而不效二子請禳之夫人曰汝曹執德不固乃若是耶蓋自宮師教以義方而又屬饜舅氏大夫公漸之訓昭晰無疑故卓然有力如此卒之日寔嘉定十四年五月癸丑也享年七十有二子長錡次耕以夫之教皆畏義而自修彊學而立志耕嘗以漕舉登名春官女二長蚤亡次適進士戴燧孫男三人女五人長

適進士鄭宗魯初何公寔于鄞縣陽堂鄉下水陽山之
原于今三年矣是歲十一月丙申二子奉夫人之喪合
葬焉嗚呼見善則遷有過則改立身之要道也以小善
為無益而不為以小惡為無傷而不去自學者不能免
況婦人乎而夫人則異于是方髻齠時嘗省其外伯祖
樞密公愛几間漆合取而玩之復置其處樞密之女曰
中有可食汝欲之耶吾取以與汝夫人甚慚曰因好弄
而見謂有欲是吾過也此豪髮之事爾而終其身深以

為戒其志念篤切如此且非獨自淑其身而已時事得失未嘗不關心聞斯之禍不勝慘怛寤寐不能忘曰吾民何辜而至此極惟明智故多憂惟慈仁故博愛此夫人平生之所存也二子求銘稔聞其賢不敢辭銘曰吾觀夫人之歿賢弟同知追思痛切屬辭祭之其間有曰嗟吾姊兮非吾姊兮實吾畏友兮蓋若古有訓切悃怡怡今閨門之內乃兼有之此同知所賴以立其身原所繇來故意篤而語真亦足以知夫人之賢超絕乎等倫

矣

林太淑人袁氏墓誌銘

太淑人袁氏贈通議大夫林公諱勉之妻也林氏四明
大家紹興中特進公為名侍從治家有矩矱謹擇冢婦
知淑人柔順端肅為通議聘焉淑人事母篤孝夫人信
愛異他女使掌珍藏無秋豪私及嫁歸諸母氏不以一
物自隨其廉正如此時年十有七晉寧郡夫人早世淑
人不逮事姑事特進兄嫂以姑禮下氣怡聲供盥櫛奉

食飲罷然後退諸姑有未行者損己以益之事無鉅細
身親其勞罔不肅給人以為難能通議為黃姚支鹽將
行會特進被命提鹽江東子若婦莫從淑人謂通議事
親為重姑遲官期奉度闈乎因留侍數月喻遣再三而
後就道黃姚瀕海鬻鹽多私賈賤于官榷莅官者私焉
淑人曰監臨敢爾可乎通議然之迄去買官鹽以食人
服其清抑內有助焉通議嗜學不倦淑人既順適其意
又自課諸兒讀書聲琅琅終日特進甚悅畀以所佩魚

曰而子後必有達者通議官中都而卒淑人于是年二十七爾守節堅確誓無他志哀痛方切重以特進之喪備嘗艱棘念門戶凋落欲振起之教子益嚴名儒碩師亟使請益所以培植磨厲者甚備後其子祖洽以學行材請丞司農守三郡為時聞人賢母之教俱顯其亦勞矣而自視歉然若不及所至郡聞職辦喜見顏色即雨暘不時齋戒以助請禱歲凶民饑趣使賑卹母得少安言特進起家寒素疊疊不厭戒子孫勿敢忘自奉甚薄

曰寧不足毋得適分居不求安食不御肉寒暑締紉僅給而止然義所當用不靳歲時祭饋不問有無極于精潔周人之急過于己私甚者傾箱篋聽自擇無毫髮顧惜意親黨以此益賢淑人翕然稱曰雖古賢婦不過也天下是非之分實與不實而已淑人德非一端以篤實為本偏私巧偽不萌于心諛辭誑語未嘗一出于口易所謂有孚盈缶淑人有焉可不謂賢乎攷其平生為女為婦為母之道始終咸備不根諸篤實能如是乎凡七

叙封晚益光華則其實德之報紹熙五年冬寺丞君以
朝議大夫守真州奉板輿以行明年當慶元元年十一
月二十八日淑人終于官舍壽七十六輅車還鄞遂以
二年九月二十六日葬于陽堂鄉龍山之原蓋淑人之
志云始通議君塋桃原西嶼今幾四十年矣弗果合淑
人家世鄞人曾祖諱敷左朝奉大夫贈光祿大夫祖諱
灼左朝議大夫考諱埴登仕郎子男四廣壽早卒次寺
丞君也次祖壽次祖昌登仕郎亦皆早卒一女適朝請

郎陸杞孫男岳修職郎密迪功郎密啓孫壻儒林郎錢
萃宣教郎陳卓曾孫男四女六維林氏世載令德閨閭
多賢有蔡夫人者寺丞君之四世祖妣也婉淑有節操
嫠居介然起敬鄉黨醉呼者過門亦羞愧自戢曰母驚
此母淑人聞其風而師焉每曰吾何法法蔡夫人爾冰
寒玉潔前後相望有補于世教故宗黨為之語曰百世
之紀蔡袁夫人淑人葬有日寺丞君雪泣屬某以銘某
知吾姑為詳不敢辭乃繫之曰惟古賢婦聲于詩歌我

名斯人千載不磨

太夫人戴氏壙誌

太夫人戴氏明之鄞人免解進士諱冕之季女戴為鄞之桃原鄉著姓家故饒財外祖父始修儒業教子有法度以夫人聰明靜專柔嘉孝謹可教也授以諸經肄業如二兄母蔡氏誨之尤力婉婉聽從織紵組紃酒漿籩豆菹醢凡古公宮所教彤管所紀德言容功日從事焉惟謹字畫倣顏體甚婉而勁不喜遊觀博奕聲歌浮靡

之習親黨愛重之年十八歸我先君惟志于學太夫人
雅亦好書夙夜警戒相成之道如益友然先君執大父
喪家務不理太夫人攻苦食淡斥房奩營喪葬償逋負
買田宅恭儉恪勤生理粗立歲時祭祀潔蠲盡誠睦宗
族待賓客井井有條皆可為閨閫法先君教子甚切太
夫人助之始學則教之書手寫口授句讀音訓必審長
則期以遠業朝夕誨勵每自抄錄自古人言行前輩典
型與夫當今事宜班位崇卑人物高下及民間利病休

戚大抵皆能道之諸子從容侍旁議論往復疊疊不厭教孫如教子童幼既多羣嬉成市夫人頽然堂上且喜且戒課以讀書作字無敢不謹過子婦以恩于妾媵不如處事必度于義待物寧過于厚寬而明愛而公其德美未易于悉數其多能餘事至于尺牘之工屬辭措意為人傳玩晚而好佛讀其書甚悉委諸子家事澹然無營先兄承顏順志倡率家人奉之甚謹足以佚老矣不幸而嬰大戚晝哭之明日復晝夜哭變故非常積憂熏

心淳熙辛亥之冬奉先君輜車及墓除夜漏未盡數刻
腹疾作黎明益侵俄至不救寔三年正月朔旦諸子哀
號隕絕罔知所為獨念先君葬日既卜不可復易迺翼
日襄大事退而棺斂太夫人將奉以還里舍川涂間闕
咸謂非宜即寓館為殯宮遂以其年閏二月壬申與先
君合葬于陽堂鄉之穆公山嗚呼痛哉積善之報宜吉
而凶事起倉卒不得竭力醫療不終于寢不殯于家冤
乎酷哉享年七十有二長子覺鄉貢進士先太夫人十

有七月卒次燮儒林郎沿海制置司準備差遣次藻次
未名而天慙預鄉舉長女適太夫人之姪宣教郎諸暨
縣丞戴樟次未行孫男女八初吾家父母俱高年兄弟
相友愛綵衣團欒其樂也無涯歡娛未終酷罰及之追
思俱存無故之時何可復得親庭慈愛隆于山岳人子
補報未能毫末相繼淪喪慈顏永訣痛可勝言哉葬有
日燮等忍死書歲月納諸壙當代人物必有能銘吾親
者嗣將有請焉先君姓袁氏諱文字實甫男燮等泣血

謹記

太儒人范氏墓誌銘

昔我先伯祖十三府君清約自守不染俗塵若古所謂
山澤之癯同里有范十九丈者倜儻尚氣遇事敢為若
古所謂閭里之俠此兩公者氣質不侔而同于為善亦
猶拱璧寶劍器物雖殊而同為可珍鄉曲公論俱推其
賢足以合二姓之好故范氏之女遂歸袁氏實為先叔
父迪功郎監南嶽廟贈通直郎諱方之室晚以仲子陞

朝封太孺人者是也諱普元世家于鄆曾祖諱文祖諱
佺考諱醇以承事郎致仕累贈奉議郎妣孺人楊氏太
孺人之初嫁也年十有八而熟于禮節家裕于財而謙
謹與寒女等伯祖見之大喜曰此我家之子婦也而叔
父亦年十八志氣頗豪舉裁以正道勉使從學脩脯之
費率由已出且經紀家事不以累其夫叔父于是乎收
斂精神遵蹈規矩伯祖所居地不滿三畝欲稍闢之力
不及太孺人謂通直曰福小如是雖苟安目前獨不為

子計乎會並鄰有求售者亟鬻嫁時所自隨之田以買之納其券于舅舅驚喜曰有婦如此吾得所託矣其無所靳惜既有似乎迺翁之倜儻其薄于自奉又有似乎迺舅之清約得于薰炙兼此二美以故令名日出里中三歲大比精于詩學者纔取其一而通直得之其後累舉不利資用良窘太儒人苦心刻意累積纖微躬蠶桑若補紉等事男女滿前衣服楚楚曾不見其垢敝通直年五十餘多疾勸以清靜獨設一榻而調劑藥膳費無

所靳迄獲痊愈察其心無一日不以門戶為念警策諸子專精務學毋自棄暴仲子由是踐世科而通直亦以科補官平昔所期至是少遂矣既盡力于夫家而又深念其親不能暫忘親亦深愛信之奉議之寢疾也屏左右悉不用而專屬以湯劑之供昕夕卧內跬步不敢離月餘衣不解帶以篤孝稱就養黃巖每聞箠楚之聲掩耳避之仲子敬承其意率以寬厚為本時分俸金賙給親族亦母氏之志也歲在庚辰鄉邦遭鬱攸之變延及

舊廬聞之流涕曰百年之居燬于一朝前人遺跡略無
存者是可痛也既而釋然曰吾賦祿之家力猶足以葺
治生計蕭然全無可仗者何以堪之爰命其子亟走一
介存問而補助焉其仁心惻怛如此所以培植本根者
志念深矣長子雖未第而辭采可觀有進取之具諸孫
亦多俊秀門戶之昌其未艾乎維袁氏素以儒學起家
而范氏亦然蓋自太儒人之兄臨川丞槩實啓其端而
弟楷繼之今為諸王宮學教授官教之子光又繼之今

分教金陵兩家相望名節班班餘慶所鍾久而未歇非
若尋常之流微倖于一時易盈而易涸也君子以是知
通直締姻之初采諸鄉評契合無間者豈偶然也哉仲
子為邑滿秩以奉議郎通判紹興府密邇鄉邦祿廩差
厚他日之官將母以往人子之至願也新居始成宏敞
明潔殊與舊廬不類以垂白之年安處其中始足以極
燕頤之樂旬有五日忽感疾焉百端治之沈綿累月竟
至不起寔嘉定十五年二月丙申也享年八十子浹洽

漸漸先一年卒女適進士顧應龍國子進士貝自成孫
世公世範世仁世輔孫女長適張炳次許嫁孫源皆進
士餘二人尚幼孤以其年十一月庚申舉太孺人之柩
啓通直之窆合葬于鄞縣陽堂鄉南嶼之原哀泣請銘
惟太孺人在家則為賢女既嫁則為賢婦及預家政又
為賢母其為人也溫柔可親而不失之弱聰達過人而
不矜其能其相夫子也切磋如朋友而未嘗不和其御
婢妾也雖不厲威而終不敢慢德厚而才裕識遠而慮

深春秋雖高精明自若凡我族黨論閭閻之賢行以為
稱首此名豈虛得哉某辱在子姪之列知之悉矣不敢
輒辭銘曰蘭生深林其薌自達玉韞石中其輝自發猗
歟若人養德閭閻不求聲名乃爾烜赫慶源深長福基
不拔猗歟若人端可為法

夫人邊氏壙誌

吾妻邊氏慶元鄞人曾祖諱日章祖諱用和父諱友益
年十九歸于我夫人母張氏嫠居守節教子女有法度

每語之曰而夫之貧而父所知也為汝擇對惟以嗜學
故母敢不恪夫人敬遵之承上拊下服勤不懈男女八
人自乳其七飢飽寒燠節適謹甚無頃刻不繫于心無
毫釐不至之處自言吾之心寫于兒之身兒小不安終
日抱持未嘗置之衽席委之他人也察之微護之謹故
咸遂以長而無夭折之患一室纔丈餘隆冬不見日色
而盛夏烈日暴之居其中者二十有九年安卑陋忍窮
乏母家饒財曾不取貸焉與吾處外若少和察其私愛

敬備至吾飲食衣服烹飪補紉常躬其勞而不使吾盡知之其用錢其遺人物雖甚微亦必以告每曰吾心如大路人皆可行言由中出行無外飾少壯時性頗嚴久而寢寬十餘年間婢妾無捶撻者雅意澹泊不貪榮利吾與子肅忝世科若固有之無欣喜色吾以罪去國達官有憫其失職欲稍致力者艷然曰若因人而得之何榮之有吾為浙東帥屬俸入或循舊例可以取可以無取間與之謀必以勿取告為子擇婦資遺厚薄聽其所

為無幾微見于言色拊之均平愛憎之迹泯然無有家
事細猶必親中歲猶然諫止之弗聽夜率彊半乃寢衣
或三十餘年不易嫁時所服比其終之歲有可以見賓
客者用雖甚儉禮無遺闕有綱有紀閨門肅如也嘉
泰三年春吾將之官閩中念其方屬疾也難之夫人曰
家貧仰祿以給盍亟往既行閱篋中衣必有副或至于
三以吾單車獨行慮有缺也嗚呼居疾病中不遑自恤
而為吾區處纖悉如是此意詎可忘耶及秋疾平如常

時有適閩之興十有二月疾遽劇旬有一日竟以不起
凶訃至閩哀痛切骨追思平昔艱難辛苦人所不能堪
者備嘗之乃不得一見而訣倉皇還家物是人非慘愴
之懷何可具言哉男四人長喬次肅從事郎江州觀察
推官次甫次商女四人長適從事郎監鎮江府寄椿庫
林密次適進士鄭景淵餘未行四年三月壬申葬夫人
于縣之陽堂鄉穆嶺先墓之旁夫有美而弗書不仁也
書之而溢美不信也據其平生大略據實以書義所當

然非私也葬之日納其石于壙茲吾妻之藏密邇先舅姑取古人族葬之遺意云

安人趙氏壙誌

安人趙氏故太師鄒王諱仲御之曾孫女太師韶王諱士樽之孫女而武節大夫諱不忖之女也妣宜人黃氏繼母宜人高氏年十六歸于今武經郎新樞密正將袁君任安人生長皇族耳目所接熟于豪華貴盛之習與寒素有間矣武經吾弟也自高大父光祿公以儒起家

子孫遵教居處服用率從儉約與貴家不類安人之來
宜若不相契者而姿性婉淑篤志為善無驕暴侈泰之
心奉承舅姑載祇載肅相夫子柔而正夙夜警戒有古
賢婦風蘋藻吉蠲米鹽靡密織組補紉之事皆身親之
殆有甚于寒女又遇下有恩無嫉妒行尤婦人所難能
武經于是委以家政一無所預而得以專其精神勤修
職業安人之內助為多開禧二年大饗覃霈封孺人嘉
定五年郊恩封安人六年十二月六日卒于長沙之官

舍享年五十反葬于鄞縣翔鳳鄉青山之原以九年二月乙酉窆子一人南補承信郎女一人適修職郎新紹興府司戶參軍趙時擇葬有日武經痛賢助之亡追思不已請書其平生大略而納諸壙余平生喜道人善凡一節可稱者率錄不棄矧吾弟婦德美著聞親黨交譽僉曰此閨閫之則也而可以無述乎遂書以授之

素齋集卷二十一

欽定四庫全書

絮齋集卷二十二

宋 袁燮 撰

廟碑

簽書樞密院事王節愍公廟碑

紹興十有四年七月戊午故簽書樞密院事王公不屈于金死之公之使金也以天子命諭其帥歸我河南地以和其帥聽命惟謹事且集矣烏珠惡其專譖而殺之

留公河間者六年彊以偽命公義不辱罵敵以死嗚呼
大節巍然于是乎貫日月通神明矣蓋嘗論國家之興
非獨腹心之臣謀謨于內爪牙之士戰伐于外仗以成
功也亦惟有肝膽忠烈達于大義冒死不顧者為之砥
柱焉故齊以田單存而王蠋亦有功漢以三傑昌而紀
信周苛亦有功唐以李郭復振而顏杲卿張巡盧奕之
流亦有功焉然則我宋之中興趙張岳韓之功信偉矣
而全節如公者亦豈可少哉公始至敵廷問二聖起居

悉心經營卒達上意厥後迎梓宮迎太母犯難而行曾不自顧每先以酈食其唐儉自處屢言于上苟有可乘之機毋以臣故憚于進取又言臣昔在金知烏珠幾為我擒山東河朔日俟王師時不可失此豈區區怯懦專以成好為足恃者河間之留歲月既深金以公備嘗艱阨不堪其苦可啗也而終不少屈堂堂乎與忠愍李公英風義概前後相望迄今聞者莫不興起其有補于世道豈不博哉君子之所為固有初若昧昧而其後昭昭

者公秉心如是而持正論者訖時宰議和之失并以及公蓋未覩其忠爾時宰忘國讎恥自為身謀和議既決不易宰相著為信誓豈忠臣之用心哉彼惟固位公乃捐軀邪正之辨明于黑白故要其終而遂轍判矣時宰恥其不若不以實聞既歿天子始知公之死節孝宗嗣位官其三孫至光宗時賜諡節愍逮我皇上褒贈有加以公葬吳陽山乃詔廟祀于吳卜築于子城之真慶坊時公孫柟尹正京邑建請于朝故有是命柟遵奉之乃

斥私財是營是度崇閣屹如寢堂翼如豁以高軒繚以
長廊處祝哭于旁舍募道流以汎掃買良田收其入以
贍給之規模既備具矣會遭內艱故雖賜額忠肅而碑
猶未建既免喪復拜京輦之命始錄顛末而屬某潤色
之某雖寡陋然高山仰止之詩詠之久矣茲不敢辭公
諱倫字正道大名入景德祥符間名宰相魏公之諸孫
也先是晉公手植三槐于庭曰吾子孫必有興者源深
流長奕世顯融至公復以節著明于君臣之義達于死

生之說本心卓然俯仰無愧可謂一代之奇傑矣嗚呼
金人無道戕我忠臣天實惡之數傳之後迫于強鄰奔
逆竄伏不絕如綫我有忠臣不屈于金天實右之列聖
相承迄今昌盛天之福善禍淫豈不甚昭然哉公之忠
誠向也未白時宰抑之也然斯人之後湮沒無稱而公
有賢孫振興門戶福善禍淫之理益信不誣公之所存
天固知之矣雖更百世英靈如在于其祭也其可無歌
以侑之歟乃作詩曰河朔人物如渾金稟資篤厚天機

深故家遭亂悲陸沈南來氣骨猶蕭森惟公貌古氣駸
駸自請掉舌鋤驕淫剛腸憤激涕沾襟一死如蛻獲我
心乾坤倏變晴為陰雪電隨雨風號林精誠上徹天監
臨誰其蔽之繫孔壬事久論定昭純忱有嚴廟貌巍冠
簪牲肥酒列神其歆可解民愠如薰琴驅彼疫癘無敢
侵油然層雲早為霖豐我廩庾高于岑神有大賜民其
欽

祭文

祭參政大資樓公文

嗚呼元老大臣國之表儀萬姓所仰天子是毗不有人傑孰堪尸之人皆謂公寬平樂易并包兼容渺無涯涘孰知其德濟弘以毅自登瑣闥高節凜然守正排姦弗撓于權屏居甬東閱十三年更化伊始歸見天子遂參政機寵光有煒人皆謂公若無同異孰知其心有一無二自古共由惟一坦途苟適他岐茲惟姦諛公之燕居榜曰攻媿行已大端其敢有戾身雖廊廟心則巖壑念

念歸休底無愧忤帝惜其去固挽留之疾云甚矣始容
其歸歸纔決辰奄馬易箚訃聞四方孰不痛惜古也有
訓生榮死哀人哀其亡豈易得哉某實蠢愚荷公誘掖
茲還班綴值公寢疾日俟其愈得復親炙公今往矣我
將疇依遐想音容悵不可追薄奠一觴涕泗交頤嗚呼
哀哉

祭倪尚書文

嗚呼自古為國必有正人主張維持公道以伸故立于

朝廷則忠言讜論不知有身而位乎岳牧則撫民如子
養之如春其或退而歸休則德望歸然人皆覲其復用
及夫不幸而歿而人心盡然莫不為之傷痛此公始終
之大致也博通古今探索精微詞華炳蔚端有指歸方
當盛年早登青貫屢起屢仆卓然不亂年未六十剛腸
室慾清明溫潤如冰如玉更化之始正位常伯瑣闥封
駁正途斯闢自爾居閒山巔水濱逍遙自適不緇不磷
遺奏懇切有規有戒死不忘君可謂深愛此公之始終

無愧也嗚呼曾謂盛德如斯而不克究其設施乎某始以諸生事公成均及官于閩模範益親我性好直惟公能容有所切磨靡不樂從我或抱疾問勞不絕亦既見止改容歡悅平生知己如公實希幽顯永隔再見無期追念疇昔潸然實涕薄奠一觴昭此誠意

代宰執堂祭林樞密文

自古公朝必登正人屹然特立標準薦紳紀綱迺張風采聿新公秉直道出逢昌辰學有根源行無緇磷聖主

嘉之如獲鳳麟真諸周行溫溫其仁仁固有勇力回萬
鈞其在柏臺忠不顧身其在省闥直氣益伸兩繇禁橐
出牧小民吏治藹聞如古之循彼何人斯妒我忠純逃
讒于鄉巖隈澗濱藝花植竹恬養天真屬時更張拯溺
亨屯起公既老倚其經綸宥密本兵碩輔龐臣中國可
尊四裔可賓甫六閱月大故遄臻人望實傾誰不酸辛
矧我同列心跡俱新忽焉僊去挽留無因惟有痛哭涕
泗霑巾公之憂國生死則均正途方闕不可復榛公道

方明不可復堙追惟此心敢有所遵相期努力慰公之神薄奠一觴矢心以陳嗚呼哀哉

祭提舉趙公文

嗚呼公之此心天日可鑒人不盡知公則無憾公方壯歲仕已有名剖決從容繩直準平更歷中外始得一壘吏畏其明民誦其美帝用嘉之擢之庾司周爰咨度民瘼究知乃趨嚴召指日清切誰其間之事復中輟公于權臣親雖舅甥公則不阿直道而行權黨曰蘇炙手可

熱公深疾之彼乃媒孽折簡要地諷使逐公心苟無瑕
喪與得同大化既更公應復起竟以前累棲遲故里才
非不高窮達在天奄焉長辭齋志九泉某官于闕充員
賓幕困蹟之蹤賴公橐籥出谷遷喬誰實為之匪公獎
拔曷臻于斯永懷此德其敢忘報屢言公賢曾不少效
天族之英薦紳所推位不配德孰不嗟咨矧惟門牆辱
知不淺宣期一朝遽隔幽顯欲拊其官身縻于茲恫哉
此心寓此一卮

祭大丞趙公幾道文

嗚呼人才之難久矣幸而卓犖不羣器能足以任重謀
慮足以經遠者又不幸而正逢荆榛時論柄鑿戛戛乎
其難合則亦終不得以有所展布嗚呼公乎何其才之
傑而命之屯乎英明敏達是非立斷宦游所至聲稱籍
籍天資可謂高矣學問以充之師友以磨之養之以寬
洪守之以堅正寧陸沈于下位恥阿世以苟求迨夫賢
輔當國推揚甚偉可以奮飛矣時事驟變卷而懷之棲

遲巖壑樂道無悶潛心于義理之精微周覽乎記載之
浩博國朝之本末源流中興之經營建立講之尤詳固
將以有爲也此志未伸獨以所學施諸閭閻勞則身先
之財則衆共之雍雍肅肅人無間言善類推輓漸為時
用禮樂筆削之選亦稍清矣其若沮之者何沮之未害
也其若病之者何病猶未愈也重以內艱朝方更化久
屈復伸而公獨不預沈綿兩年竟不起疾嗚呼何其才
之傑而命之屯乎公之隕傾海內所痛矧惟姻親痛當

如何雖然士生于世患乎斯心有愧而已苟無愧心窮
猶達死猶生也公復何憾若夫天下之元氣惟得善人
保養之則邪氣不能干天下之公論惟得善人主張之
則邪論不能勝公之存沒所繫匪輕是則可憾焉爾想
公精明如在目前薄奠一觴千里寓誠嗚呼哀哉

祭郎中詹公子南文

昔我與公同僚會稽道義磨切古人相期惟公秉心篤
實不欺學有根源象山是師維此象山發揮精微毫髮

不差昭晰不疑公遊其門累年于茲既疏淪之又培植
之充此美質如璋如圭天台之政吏戢民依自列于朝
人望益歸典司宗祏蘭省有輝出牧大邦仁恩是施貴
名方起胡擿其疵心苟無瑕孰為成虧一疾不起曷止
于斯吉人云亡孰不嗟咨矧我恩親諸如墳簞喪此良
友孰箴孰規欲拊其棺職守所縻平生交情寓此一卮
我心之悲曷其已而

祭李蘄州文

嗚呼父母全而生之子全而歸之古之明訓也所謂全
歸者豈獨其形體哉雖殺其身苟得其正即全歸也故
曰志士仁人無求生以害仁有殺身以成仁嗚呼若公
者可謂能全其仁矣可謂不負所學矣大義所在視死
如歸高節凜然夫復何憾所可惜者朝家失此真賢朋
友喪此彊助國事將如之何吾徒將如之何嗚呼哀哉
嗚呼痛哉

祭通判舒公元質文

某與吾兄金蘭之契餘三十年義均兄弟聞兄之疾旦
旦懸繫自溫還明休息勞勩謂沈疴之既痊每拊躬而
自慰曾不幾時遽以訃至驚呼失聲何以至是喪我良
友如之何不痛心實涕也嗚呼兄乎天稟之粹如彼鳳
麟為時嘉瑞自始奮發蜚聲槐市經術淵源辭采宏麗
退然不矜日益磨厲隆師親友剗心刻意思古聖賢標
準萬世仰攀高躅謂必可繼操行有常屋漏無愧不求
名聲不貪榮利護養良心毋敢失墜孚于家人施諸政

事教養作成士賢而藝吏畏其公民懷其惠平生力學
纔見一二謂福履之方隆俄一朝而川逝嗚呼兄乎孰
能盡力閨門如兄之躬行孝悌乎孰能保養名節如兄
之肝膽忠義乎又孰能舉世信之如兄之不遭譏議乎
致其終身蹈履純備死生夜旦夫復何喟而所可深痛
者朋友之切磨之益而後學失歸依之地也聞兄之喪
欲往莫遂拊棺慟哭形于夢寐寓哀情于一觴望靈帷
而涕泗嗚呼哀哉

祭豐宅之文

嗚呼公乎生長名門人品卓如長纔六尺膽大于軀見義勇于必為見惡果于驅除若大川之決勢莫能禦若莫邪之刃利無與俱自參謀于宣幕始漸展于鴻圖洎丞郡于豫章憫疾疫之毒痛委巷窮閭徧歷勤劬人給之葯病者以蘇推是心于作牧達民情之慘舒推是心于建臺宥邦用之盈虛當邊陲之驛騷分閫寄于名都氣讐強鄰誰敢侮予帝深念其勞勩俾易鎮于南徐俄

一疾兮不起飛丹旆兮歸歟殊勲未立真才先祖朝家
失所倚仗壯士為之長吁生輕財而重義歿傾囊兮無
餘信清敏之裔孫庶乃祖兮無殊嗟我與公肝膽交孚
屢貽我以書尺豁此心之鬱紆覲復接于誨言講濟時
之規模此志莫酬愴焉歔歔念牽帷兮一慟纏哀病兮
躊躇陳薄奠兮一觴表素心之區區嗚呼哀哉

祭胡達材文

維兄資稟端良德宇粹夷刻意為學古人自期求師友

于四方探聖賢之淵微不違世以立異不同流而詭隨
恬澹自守不求聞知此善類所資以磨琢而吾道所賴
以扶持謂降年其有永何一往而莫追信天壽之不可
必而造化之未易推也頃年以來四海師資彫零亡幾
猶有友朋相與發揮孰謂吾達材氣方盛志方篤德業
方茂平生抱負百未一施而遽為九泉之歸也自達材
之歿朋友痛悼哭過乎悲而予縈于世故病不得問其
疾死不得撫其尸葬不得臨其穴愧吾顏以忸怩茲行

役之既返始克奠于靈帷嗟亡友之永隔滂涕泗以交
頤平生交情寓此一卮

祭戴宣義文代先淑人作

嗚呼昔我先君積善成德燕及後昆團樂之樂萃于一
門遭時艱虞老穉驚奔慶源未竭數口猶存雙親兩兄
與已而五喪亂既平幸且安處嗟我微軀阨于棄捐保
抱攜持賴兄以全親闡辭世終天抱痛猶有兩兄白首
康共相期百年三壽作朋云何不淑喪我伯兄惟我伯

兄色和氣清處已待物一根于誠天屬之愛同氣之親
情義相與始終惟均典刑未泯篤老不昏自古有死哀
哉若人有懷疇昔五人相倚豈謂今者兩人而止窀穸
有期幽顯永隔祖奠一觴心焉如割嗚呼哀哉

祭叔父通判文

昔我先君與吾叔父曾無間言俱敏于學好是懿德厥
有本原其學維何洪河長江衆流所奔其德維何拱璧
大圭天然粹溫先君既歿每見叔父如親猶存教我誨

我六經百氏靡不討論叔父之賢智愚戚疎誰不敬尊
典教兩州贊治一邦名徹帝閣年登上壽好古嗜書神
明不昏謂當期頤永錫難老福祿便蕃如何不造武陵
風月曾不平分位不配德倏然長往孰招其魂二子早
世克承其家賴有二孫畢力經營蔚其新阡董溪之墳
吉人云亡行路實涕矧某弟昆喪我叔父孰開其明孰
導其源追念平昔警策諄諄永矢弗諼無以報德惟當
勉勵不辱吾門輻車首途幽顯永隔有淚如翻嗚呼哀

哉

鄉人祭魯國夫人文

人傑之生必有賢配聲氣相符天作之對猗歟夫人生
長名族左圖右史景仰高躅來嬪大門蔚有令儀承上
接下德無不宜儷我元宰曲盡婦道相對如賓琴瑟靜
好元宰賴之閨門肅雖乃得專精興起治功君恩日深
相門益大人所甚榮不忘敬戒象服魚軒湯沐大都人
所歆羨視之若無克儉克勤始終惟一克齊其家井井

秩秩平生學道了達死生曾不怛化時行則行人亦有
言仁者必壽天胡嗇之其年不究皇情愴然念我宗工
失此良助此心其恫乃頒卹典載優載渥旌我柔嘉慰
此冥漠夫人之亡孰不悲傷矧我諸人扮揄相望痛念
淑德當今鮮儷薄奠一觴將此誠意



絜齋集卷二十二

欽定四庫全書

集部

絮齋集卷二十三

四三

詳校官庶吉士_臣初喬齡

主事_臣呂雲棟覆勘

總校官編修_臣王燕緒

校對官中書_臣高中

謄錄監生_臣何照鄰

欽定四庫全書

絮齋集卷二十三

宋 袁燮 撰

古體詩

以鑑贈趙制置

吁嗟此鑑惟銅之精磨之治之瑩乎其明其明維何洞
燭毫髮非由外至實自中發我有良友天支之英雄鎮
江淮為時長城我寶此鑑持以贈之此鑑此心昭晰無

疑鑑揭於斯中涵萬象物自不逃初非鑑往人心至神
無體無方有如斯鑑應而不藏鑑以塵昏心以欲翳欲
全其明盍去其累經武折衝厥任匪輕勿貪小利勿徇
虛名律身惟謹上功必實欺心不萌精忠貫日選擇僚
佐為己強助衆明翼之厥光彌著昔者武侯發教羣下
孜孜求益不自滿假陸抗摧敵東還樂鄉貌無矜色謙
沖如常兩賢之心惟其罔蔽千載凜然猶有生氣惟君
天資無歉古人願如斯鑑光景常新

丁未之冬營房告成有亭翼然名之曰勸功且
為歌訓迪有衆

維此江壖控扼之所居安思危可無備禦維彼強狡巧
於乘隙萌孽弗除其欲罔極孰堪制之維汝弓兵猛虎
在山百獸震驚勇無堅敵謀無遺慮如彼獵師靡逸狐
兔亦如農夫稂莠是芟寇盜斯戢善良斯安吾民膏血
為汝衣食可不念此為民除惡國用方窘于汝常給可
不念此竭誠報國無或徇私貪求肆虐無或荒嬉酣飲

捕博強汝志氣精汝武藝習汝行陳昭汝果毅我聞在
昔元勲茂烈發迹孤矢登壇授鉞反觀此身均一丈夫
彼既能然我豈不如黽勉從事不辭險阻風餐露宿舍
辛茹苦汝身則勞民獲安堵肝膽忠義神其福汝我作
營房亦既勞止用集爾衆緩急有備營房之居義均弟
兄務在和睦毋或紛爭營房之居法如軍旅什伍相長
其傳自古以大總小先正其身以小承大期於率循我
築斯亭名曰勸功爾有勤勞是獎是崇爾或有罪吾不

汝貸鞭扑斥逐其恥為大凡爾有衆各敬爾德習此歌
詩持循罔失

安邊

安邊在良將至矣晁生語邊疆無良臣胡能固吾圉孰
為國之良四德貴兼取智能制勍敵仁能撫軍旅勇足
任爪牙忠足寄心膺信哉人中傑勲名在王府斯人世
不乏感會待明主藝祖英睿資一劍定區宇憤彼敵人
驕求我萬虎侶三邊十四將人人奮材武威名被草木

折衝自搏。但當年寵遇隆。噲等莫為伍。關市擅征。權金帛。豐賜予機。要時面陳。延見虛當。宁天顏對咫尺。殿坐得容與。等級忘尊卑。親愛均肺腑。久戍二十載。近亦十寒暑。漢超守關。南販鬻如巨賈。法令安有此優詔。特聽許進也。治居第。甌瓦覆其宇。有司每堅執視進等兒女。府庫有餘蓄。捐棄如糞土。犒賞飫牛酒。驍雄率鼓舞。貪夫冒絕險。敵情畢親覩。陰謀數侵犯。先事嚴備禦。師徒雖不多。勇悍莫予侮。攻伐雖不聞。威德自周普。乃知安

疆策保境功最鉅漢高豈不偉平城亦良苦卑詞結和
親金繒奉驕虜何如我宋興主聖羣龍輔北人先屈膝
茲事掩前古方今雖治平微桑未陰雨和好寧可恃人
材要多貯古來最爾國拔十且得五蜀有關及張吳用
周與魯多士今如林錯薪刈其楚勿由權要門要以公
論舉會當略細苛毋使畏網罟深宏植本根周密固牖
戶恩榮有感激施設無齟齬聞昔淳化中有臣曰承矩
方田遏敵騎塘灤深險阻當其建策初羣議亦交沮皇

心斷不惑邊城近按堵往事可為則明時豈無處規模
要經久廢闕要紉補器械要習熟人民要生聚委任果
不疑讒言敢輕吐守衛果得人成功要有敘孰為當今
時視我開基祖

上中書陳舍人三首

鳴玉青瑣闥揮毫紫微垣仰參鸞鵠翔俯視燕雀喧異
時憂世士才學窮根源亦有濟時策無因通帝閣公居
清切班日對龍顏溫嘉會千一遇論思母憚煩

士方負材業高價敵璠璣一朝聲稱減碌碌盆盎如貴
名豈不欲名盛復難居所以古君子謹終如厥初自公
到京國聞望傾萬夫願言益進德名與天壤俱

重明麗宸極萬國熙王春翹首望德政從今斯一新當
年羽翼客休戚一體均致主欲堯舜規模戒因循古來
王佐才宇宙歸經綸期公繼前作百世稱偉人

與范總幹

賢士未達時懷寶混塵境得志行所為澤民效伊尹常

深納溝念疾苦勤訪問所期培植豐肯訖裁決敏所以
冀黃輩仁聲達幽隱是時民氣樂魚躍快於物高躅欲
追攀是心先戒謹日憐老鈍資不敢汙蘭省竭來楚江
邊宣布寬大令牧養乃其職此事無窮盡孳孳撫凋瘵
凜凜憂饑饉今歲雨意慳齋心罄三請甘澤幸滂沱良
田稍膏潤雜種亦復熟窮閭庶安枕亭平富詞學春華
灼千品貽我喜雨篇仁心極軫軫源流自介庵句法深
以穩擾擾淫蛙中聞此古歌詠我無為霖乎丹闕何由

觀兀坐哦君詩字字堪企敬

送黃疇若尚書

軒裳本外物輕重非所關俗子不識真貪榮強躋攀苟
求既得志巧計仍朋姦誰知國士胸取舍超人寰不憂
節不高任重憂力孱公家太史氏閱世多險艱無心羨
尊顯名塞穹壤間尚書續正脈清泉瀉潺潺操修不敢
怠粹美無可刪垂垂躋政途念念思江山上欲登絕頂
下欲臨碧灣勇退得所願喜見冰雪顏是中有真趣景

賦天所慳一朝歸領略拔萃玉筍班豈若嗜進徒終身
墮荒菅家聲遂復振舊觀欣重還平生萬事足只欠素
與蠻美官非我願寧復憐綠鬟卻須富篇什麗錦爭爛
斑九重念耆德詎許長清閒強敵未殄滅罷眊正恫瘝
譬如建大厦運斧無輸般願公勉加餐暫歸隨賜環

寄武岡使君表兄

符竹剖千里休戚繫一方田里息愁嘆民安由吏良方
今重茲選俾近天子光臨遣重丁寧攷察何精詳吾兄

富才業敏銳鋒莫當論事切時務王音屢褒揚都梁雖
遠郡于今為邊防帝曰惟汝諧專城賴紀綱吾兄勤布
宣德意達窮鄉朝夕念此民啓處幾不遑世方急催科
下令嚴秋霜罷瘡因鞭笞男女失耕桑財貨豈不足衆
弊實蠹傷但能澄其源府庫有餘藏無告深可憫盼盼
將流亡根本不護惜忍以斤斧戕吾兄獨反是屬邑賴
小康願言堅此志益使仁風翔此邦介荆蠻其俗氣稟
剛宜以寬治之馴擾狡與強用法人固畏中心要易忘

十步有茂草多士詠思皇況有賢師儒德行侔珪璋薰
陶亦既久濟濟觀趨踰儒風果大振鄒魯相頡頏為政
有先務本固末乃昌規模欲傳後計慮宜深長天下久
無事武備弛不張干戈朽且鈍卒伍驕而狂教習不可
緩常若赴敵場軍陣日修明姦宄敢陸梁塞下憂空虛
積粟乃金湯郡事無不宜休譽寢以彰吾君不忘遠大
明燭無疆承宣有如此促召歸周行嗟予寡所合幽居
空激昂每懷濟川志自愧非鯨鯢吾兄捨我去矯首遙

相望我懷不能已作詩述肺腸微塵裨高山可笑不自
量相期配古人豈徒出尋常努力進此道千古垂芬芳
罔俾循吏傳專美龔與黃

送李鳴鳳使君

道山羣玉府密邇日月光負與塵世隔恍如白雲鄉李
侯好古士來自天一方裁冠英俊林棹歎翰墨場著庭
秉直筆省戶推望郎高情遽勇退遠業真難量黎庶多
困窮撫摩仗循良鷹鷂豈不鷙鳳鳥乃嘉祥生財固有

金史卷之二十三
道視民當如傷寧乏強敏稱母令本根戕仁聖子萬姓
通遐如一堂賢牧著聲績璽書隨褒揚我歸伏茅荆翹
首觀高翔

送李左藏三首

中都衣冠地振羽良獨難美材副時須步武隨鵷鷺平
生根柢學萬卷胸中蟠清規照冰玉健筆翻波瀾宦游
聊復爾榮利不可干去去展壯圖士友拭目看

憶昔議和日權門機穽深平居自好者亦或喪其心偉

哉人中傑獨立山萬尋佐時豈不欲枉己非所欽蔚然
歲寒姿肯受霜雪侵願言繼前作冠冕英俊林

人生貴得友勝己我所求搜尋窮怪珍逢此荆山璆虛
懷略輩行傾蓋均交游許賡清絕句每嘆風雅儔中年
畏作別握手如隱憂尺素煩警策慰我思悠悠

送治中楊司直

岷蜀古多士聲名爭頡頏近代推三蘓奮發眉之陽君
侯亦眉人源委故深長少日隨游宦中年擅詞場笑談

掇高科步武聯周行蟠胸富籌策振羽方翱翔一朝遽
勇退萬里還故鄉名邦贊佳政海沂還復康無計留君
行臨分徒自傷我亦歸舊隱後會殊渺茫小兒獲同升
此好固難忘流俗久頹敝振也焉得剛期君懋遠業志
氣常堅彊

送姜子謙丞於潛

磻溪有君子玉壺貯寒冰一朝辭舊隱去為畿邑丞畿
邑天下劇贊府須賢能才刃肯嘗試心源先自澄古來

人中傑進德如川增規模百年後感慨中夜興終焉不
碌碌泰華高峻增君侯資敏達而以古自繩嗜書殆成
癖幾載雞窗燈詞場賈餘勇先取蜚弧登成功不自伐
得善勤服膺筌蹄寧復顧堂奧從今升時哉佐裁決行
矣蜚聲稱吾民久懽悻德政先哀矜寧書攷下下莫忘
心兢兢俯仰無愧怍正直神所憑相期志遠大可但觀
飛騰久要忽語別慘戚不自勝我無錦繡段何以贈良
朋一言布心腹舊貫古所仍

送樓叔韶尉東陽三首

吾鄉多賢士我友更偉奇見之立哀懦不見令人思暫
別已作惡況乃三歲睽躊躇西郊外此意誰能知剛強
不可恃柔弱難自恃願君日進德古人以為期

古人重世家非為世其祿世祿非不朽風流要相續君
家富才傑海內仰名族豈徒衣冠盛要使操履篤邇來
益光華君其繼高躅

尉職最親民亦足行所學吾民苟安枕微官有餘樂嘗

聞長老言人性原不惡迷塗偶忘返見善寧不怍君能
復其初治行乃超卓

送路德章節三首

窮途分愚賢是非少復真圭璧委道側輪囷為國珍由
來磊落士處世多遭迍對越我無歡幽居志常伸豐城
有利劍紫氣干星辰終然不埋沒龍化延平津

後學寡師承私知妄穿鑿緬懷東萊公天才負超卓英
詞粲星斗偉量包海嶽寬平復謹嚴精密更恢廓哀哉

梁木摧誰歟繼前作幸有三友潛心味博約相期在
不朽與道為鄂郭

賢哉子路子德性兼剛柔險難極變態志節凜高秋訪
我大江濱亟別挽莫留問子將何之長淮理扁舟主人
得仁賢欲為經遠謀男兒處斯世器業追前修努力建
碩畫勿貽師門羞

送趙大治晦之

謝公中年後畏與親友別歲月苦不長交情固難輟況

於桑榆景撫事心欲折一朝舍我去遂恐成永訣感君
遇我厚肝膽每傾竭惓惓念斯時言論多激烈憶君哦
松日志操已超越庾臺欲推薦風之使來謁恥於呈其
身保此端以潔君今宰壯縣便道理舟楫不騎京國鯨
不改歲寒節升沈分自定義理我所說黎甿久困窮恩
惠思周浹姦欺巧蒙蔽精神要昭徹鄰境猶繹騷武備
不可闕弓兵暨保甲閱習貴嚴切懸賞勸之射人人藝
精絕莫言一邑小振作在賢傑士氣苟奮揚威聲必震

疊自憐老且病羨君健而決老病保餘生健決廣賢業
自期素不淺有志終煒燁日誦論孟書端如明鑑揭聖
賢以為法今古同一轍便郵頻寄音解我寸心結他年
再覲面偉論起衰怯

贈蔣德言昆仲三首

平生無所嗜耽玩惟古今以我淺陋質期於江海深萬
事不掛胃須臾惜光陰五夜常自起簡牘勤披尋清風
遞晨鐘鏗然感予心年來因多事力弱不自任叢書未

暇讀塵埃積中襟何當脫鞅絆歸歟松竹林

平生寡所諧疎拙以自守天鍾鑿枘性人棄我獨取世
道方荆榛營利不絕口我欲挽衰俗每每掣其肘仕版
謂假途何用醫國手再拜謝誨言古人貴不苟乘田與
委吏勤勤魯中叟吾心不可昧豈問人知否此意當與
誰寄我二三友

我生亦何幸佳友在鄰牆道義共講貫心親形迹忘邇
來忽間闊千里遙相望為別似未久炎赫變飛霜歲月

易因循志士宜自強良心虞放逸古人嚴範防及此閒
暇日書林擷其芳他年恢遠業雲路觀騰驤

贈游宣教

連日雨滂沱閭閻應甚苦慨念樂隱翁蕭然坐環堵術
業豈不精一寒乃如許請君姑置之對婦酌芳醕

贈吳氏甥二首

男兒何所急為學要立志此志苟堅彊天下無難事超
然貴於物萬善無不備厥初本高明有過則昏蔽但能

改其過輝光照無際厥初本篤實有過則虛偽但能改其過金玉等精粹改過貴乎勇不勇真自棄有過如坑穽改過如平地平地可安行坑穽宜急避事親貴乎孝事長貴乎弟是為立身本奉承無失墜門戶久衰頹盡作興起計是心通神明勿使形骸累持之久而純百福如川至

農夫力耕耘歲功必倍收吾儒用心苦學業亦有秋聖賢有遺訓好古敏以求韋編至三絕發憤窮深幽寢食

俱相忘此志何時休矧今後生輩未脫童丱儔刻苦猶
不足詎可思悠悠而母早孀居其窮未易瘳殷勤撫二
子不暇為身謀雜然萬馬羣望爾為驂駟翕如衆樂奏
望爾為天球勿云年尚幼歲月如川流及今不加鞭壯
大徒包羞輕璧惜寸陰前哲勤進修勉爾務謹重戒爾
無輕浮人百已千之庶解而母憂

夏日早起

舉世憚炎赫當暑思高秋秋高豈不好蕭瑟令人愁何

如三伏中五夜風颼颼遙空淡月落將旦羣陰收卻嫌
絺綌薄轉覺林塘幽出門任所適清與耳目謀借問塵
埃人知此佳致不

枕上有感呈呂子約

俗學淺無源澗谷纔咫尺志士務廣深滄溟渺難測俗
子一作吏書几塵土積志士雖泣官羣書玩無數廢書
固俗子既俗又奚責嗜書苟不已無乃曠厥職臧穀均
亡羊孰為失與得古人有大端後學宜取則有餘不可

盡不足在所益努力求至當毋蹈一偏失

和呂子約霜月有感二首

寒松飽霜雪冉冉翠光濕萬物困波流砥柱獨中立此
德有君子逸氣難拘繫平生憂世心如彼救焚急揭來
席未溫冥鴻去何適勸君且淹留斯民待安輯小試活
國手賡理猶可及

頑夫禪作窟狂士醉為鄉誰知名教中悠悠滋味長嗟
余學無窮勺水淺可揚講習得益友麗澤期交相風月

古猶今時序燠與涼一笑聊復爾片心到羲皇乾坤入
吾懷始信居中央

喜雪謝東林

去冬雪意慳稍稍臘三白飛霽繞到地轉盼已消釋緬
懷大有年兆見瓊玉積今茲杳難期春信亦已迫天公
豈不仁拙政難感格何時愜人意四顧苦無策東林惠
佳句似慶平地尺見戲唯何甚余方自刻責東林達余
心精禱覲有獲沈水煙未收冰花已如席皓皓埋羣山

霏霏連數夕郊原迷畔岸徑畛失分畫兒童見未曾
老記時昔幾年無此瑞驚喜欲折屐皆云窮臘中得此
夜光璧莫言不堅牢究竟多利益端能殄遺蝗亦復滋
宿麥歡聲沸閭里和氣蠲厲疫老守差自慰足寄孤危
跡小已不足道吾民幸安宅作詩謝東林至誠動金石

遊寶方山

幽岳如高人氣骨天所賦凜然超塵寰不受俗氣汚
湘饒峯巒往往窮僻處城郭去之遠誰能躡芒屨安知

古都梁夾塏有真趣徜徉東郊外青山在指顧山中八
洞列天巧於此覩蜿蜒老螭蟠巖怒虎踞如屏亦如
龕一起復一仆卷阿坐良穩狹徑足難措旁觀若險隘
中道本宏裕疊翠常回環寒泉日傾注石乳一何粲和
氣知有聚所見皆可人十步目九寓造物不能祕竒詭
遂呈露奎畫賁精舍鬼神昔呵護古稱小有天仇池乃
其附甬東有勝境豁然四牕具玲瓏皆自然匪以雕鐫
故誰謂寶方小是亦洞天數誰謂此邦陋有景即可慕

我本煙波徒雅性厭馳騫搜尋得所欲心境頓明悟賞
玩有餘味躋攀了不怖得意或忘歸蒼然迫曛暮茲山
雖可樂用之乃成路有徑不能用茅塞大可懼對此發
深省歲月勿虛度俗態易湮沒清遊莫辭屢援筆述鄙
懷愧乏驚人句

峽水

峽石險而怪峽水清且湍伊誰剪蒙密發此奇偉觀兩
龍會為一激烈不可干蜿蜒激鳴玉千古甘以寒誰云

岳扉窄亦復氣象寬我生囂塵中區區縛微官一見爽
心目古井生波瀾同遊二三子清賞有餘歡雖非暮春
日便作舞雩看

含清亭

累石為層峯而以水環之所貴超俗累瀟灑含幽姿卻
虞窮臘中四顧陰雲垂飛霰冷徹骨智巧無所施督彼
執役者努力無遲遲果然霰先集六出爭效奇續紛一
晝夜翦刻非人為豐登自此兆疫癘寧復滋明朝便晴

朗工作無愆期二事古難全今也都不虧天公念下土
所欲皆相隨我山既嶽岑我治仍連漪頻遊不知倦清
坐堪忘饑追懷舞雩風童冠俱怡怡豈徒耳目玩要是
無瑕疵此樂未易得天意扶吾衰宿恙不再作康寧當
自茲

題庸齋

人生一世間當為一世傑瑣瑣混常流有愧古明哲努
力求至道毫髮無差別偉哉平常心光明配日月

題習齋

寓形宇宙間所至習乃成事以習故熟藝以習故精嬰兒始匍匐習之能自行南人初學沒習慣如履平承蜩有餘巧解牛新發矚是皆習熟故見者為之驚矧惟君子學吾道深而宏欲窮聖賢域精微故難明聖賢與愚鄙何啻莛與楹愚夫墮惡習自蹈谷與坑善惡分舜跖毫釐當細評莫將朱奪紫無使渭濁涇根源見端的履踐嚴度程容貌必齋莊坐立無倚傾視聽一於禮言語

純于誠百行孝為本戰戰如奉盈操行潔冰玉宇量涵
滄溟經德豈干祿為善非近名方其學習初是非交戰
爭見義勇必為有過時自抨造次必致察思慮防始萌
惡念痛掃除用力如用兵善端謹護持保己如保城新
功生者熟舊習熟處生一心湛不撓四體明且清平居
寡悔尤處困心亦亨誰知人寰中有此天爵榮嗟予資
淺薄役于叢爾形主宰未純一氣血時縱橫歲月不我
與循省敢遑寧以習名其齋為我座右銘

謝吳察院惠建茶

佳茗世所珍聲名競馳逐建溪拔其萃餘品皆臣僕先
春擷靈芽妙手截玄玉形模正而方氣韻清不俗故將
比君子可敬不可辱御史萬夫特剛腸憎軟熟味此道
之腴清泠肺肝沃精新味多得烹啜不忍獨磊落分貢
包殷勤寄心曲斯時屬徂暑低頭困煩溽一甌淪花乳
精神驚滿腹此物雪昏滯敏妙如破竹誰知霜臺傑功
用更神速莫辭風采凜要使班列肅一朝奮孤忠萬代

仰高躅

題秦龍圖

良馬苦羈馵巨魚畏網罟神龍獨超軼威燄莫能禦噓
為寒室雲散作無邊雨能幽復能明可敬不可侮如何
秦龍氏狎玩等兒女巍然受其朝勁氣金石沮龍兮喪
其魄聽命無敢拒矧復察秋毫洞見龍肺腑飲食不强
致嗜好隨所取日日飽甘滋馴伏固其所誰謂有餘知
拘牽乃如許人生天地間良心實為主利慾汨其真甘

與俗子伍胡不鑒此圖保養虛明府道義有真樂不羨
主與組於我如浮雲服膺聖師語吾家素風在辛苦立
門戶勇決早抽身從我涉幽圃

題朝鯉圖

魚品不勝多而鯉為之宗曷為此獨貴無乃能為龍一
躍浪千級一噓雲萬重變化須臾間神妙無終窮其他
點額輩不敢攀高蹤維人亦如是拔萃斯為雄聖師名
其子勉以德業宗我作朝鯉圖一鯉居其中衆鯉競趨

之若效臣子恭巨鯁獨不朝悍然欲爭鋒可憐汝無識
不撥資凡庸一生只為魚鯉豈汝可同我亦不如鯉年
老無成功時時展此卷著鞭期變通

鳳仙花

鳳仙窈窕姿階前為誰容淺深十八本形貌紛不同或
饒鮮明色巧笑雙頰豐或作掩抑態擡舉羞且慵憂彼
積雨摧愛此晴日烘施粉聊自喜奪朱巧爭雄熒熒似
得意慘慘如無怵妍媸孰與分我欲為青銅西子信姝

麗無鹽敢希蹤並育亦已難我欲為老農美者倍豐殖
惡者加蘊崇花神夜見夢君何太恩恩正復容顏殊等
是紫與紅何貴復何賤有淡還有濃氣類豈相絕塗澤
間不工胡為妄憎愛襟度殊未洪君看宇宙間物象無
終窮化工大鑪鞴一一歸陶溶而君獨褊心不少垂帡
幪強分清白眼力辨雌雄風物情固參差宇宙要擴充
一笑謂花神嗟爾何顯蒙品彙豈無別畛域固有封有
生分美惡異路生西東如何暗且劣並彼昌而丰剪伐

咸自取栽培本無功形聲及影響天然巧相從人才有

邪正用舍歸至公不聞堪與猛下比顯與宮

案宮原本作功複前

韻攷漢書堪猛同時人亦無名功者應是馬宮今改正

包含貴周徧能否難混融

花神聞是語竦聽鞠爾躬再拜謝誨言堅壘不敢攻

桂花上侯使君

秋雨洗殘暑秋空渺寥廓秋清入花骨風致殊灑落何
人剪瑠璃被以寶璫絡英英妙點綴細細疑紛錯誰知
一粟中十里香噴礴自便金氣爽不赴東皇約黃棠得

中正無心羨丹雘我欲縱幽賞村醪不堪酌攀折不辭
勞相對空索寞風流賢使君襟懷富丘壑敬為使君壽
芳菲兩相若

咏竹二首

去年種蒼玉今歲抽華簪初萌節已具欲奮力未任雷
風驅急雨滂沱三日霖穉龍不許蟄倏起騰深林逶迤
初戢戢穿籬俄森森吾觀植物性漸長歲月深此君獨
超軼生來氣駸駸偉哉歲寒種有此特達心大勇久不

作進尺退復尋對此發幽興作詩因自箴

野性與俗違澹然都無營
牕前水蒼玉未能獨忘情
對之三伏中爽氣高秋橫
數竿亦已好況此繁陰成
中虛洞無物節勁老更清
霜雪自凌厲柯葉長敷榮
物意有相合人心原自明
僻居寡朋儕命汝為友生
雖無切磋語而有清越聲
入耳久亦佳此意不可名

竹几

深林碧琅玕直節空其中
截為小曲几貫以青絲總
自

然光瑩質不費髹漆工偃仰隱背穩提挈繞指從兒曹
莫輕毀此物便老翁

病目

年年苦目眚過午眊不明治之昏轉甚不治無由平何
如閉目坐湛然萬慮清非治非不治無思亦無營不勞
薰與沐神全明自生勿忘勿助長此理真至精

白髭

人生惡白髭鑷去恨不速欲留少年容藻飾欺盲俗欺

人實自欺舉世迷不復黃葉墮秋風明年會重綠髭白
不再黑白白長相續光陰駒過隙轉盼黃梁熟青春挽
不住暮景暗相促古人少壯時耳目萬夫矚今我忽已
老事業未絲粟蒲柳不禁秋撫已堪慟哭成功固有分
進德豈不足忽將六尺軀終身甘退縮白髭謹勿摘留
以警錄錄勇奮千里驥懈怠轅下踟人生百種病厥根
在多欲芟夷蘊崇之庶使茂嘉穀每懷風木感悲痛纏
心曲立身揚令名此罪儻可贖旦旦鑑白髭進進毋自

辱

他山之石

他山之石能攻玉詩人此意宜三復莫嫌山骨太堅峭
足使國珍充韞匱磨礱砥礪功日新圭璧琮璜光可燭
人生行己良獨難晝夜營營昏利慾欲為全德古君子
莫棄忠規甘諂曲忠規未必皆我友言是人非亦可錄
彼雖蒙蔽不自知察人過差窮隱伏聖人閭域未易到
責我謂我追遐躅觀渠待我最深厚我聽其言當佩服

端知良藥苦難堪已我沈疴功甚速古人聞過每欣喜
要令忠告來相續令我昏昏不自強逆耳闊疎親軟熟
嗟予未免世俗病每讀古書知不足今朝偶誦攻玉詩
從此聞善三薰沐

昭君祠

昭君天賦傾城色何事君王未曾識徘徊顧影無計留
一朝遠嫁匈奴國匈奴風日暗飛塵昭君絕艷驚國人
單于駭嘆昔未覩甘心保塞為藩臣從來敗德由女美

褒姒驪姬及西子玉環飛燕更絕佳遺臭千載堪咨嗟
毛生善畫古無有強把丹青倒妍醜卻教尤物擯絕域
能為君王罄忠益聞說昭君出塞初朔風蕭颯吹衣裾
聊將琵琶寄離恨痛絕玉顏殯老胡老胡死矣義當返
慷慨懷歸曾上書君王有詔從胡俗慟哭薄命終宮廬
自古佳人多命薄亦如才士多流落人才有益尚疏外
佳人無補何可懟君不見蕭生堪猛豈不忠君王疑信
相半終不容

題吳參議達觀齋

朱公胸次清絕塵吳公當日心相親風流蘊藉接前輩
寥寥斯世能幾人達觀名齋深有意欲把前修相警厲
只今吳公德彌劭始信磨礱成偉器古人心廣體亦胖
紛紛世俗爭豪端已私未克欲求道窺見一二皆童觀
達人大觀觀底事天地為物原不貳瘡痍疾痛皆吾身
彼我胡為分賤貴達觀主人心地明分符贊幕無虧成
每言此身非我有年來直欲非死生白髮紅顏難老態

福祿方隆殊未艾願君善保千金軀
歸覲紫宸鏘劍佩
和傅太卿喜雪

人情誰不愛飛雪臘中再見尤奇絕
對雪吟哦色即空
仙翁洞照無生滅既積既消還復飛
且飛且積俄又非
了然不是堅牢玉緬懷有感蘓公詩
誰知潤澤工夫遠
須索詩家為明辨香風天上亦飛花
較之窮臘功猶淺
綠牕怯寒蟬翠娥窮儒忍凍不能歌
何如剗閫賢師帥
臘喜嘉祥重娑娑鄧山妝點千巖白
全勝輕花飄細麥

氣和之應非偶然善政端由老邦伯

林寺丞許惠桂花

羨君仙隱占龍山愛君風度超人寰手移仙葩第一品
布列竹籬松徑間秋來月色轉清好秋半花蕊方爛斑
對花如在月宮裏誰道人境非天闕徹骨濃薰真酷烈
可人佳態原幽閒雖復施朱未嫌赤定知鄰女難同班
聞說名園富奇麗芬芳次第如循環丹心自與君子合
瓊枝更許諸郎攀我亦生來有花癖每逢絕艷一解顏

知君百金重然諾和根遣送應不慳

和李左藏離支

姑射山中冰雪姿凜然標格欺寒威一經蒙莊品題後
使人起敬如賓尸仙風道骨今何有韶顏豐頰誇絕奇
閨中有美信姝麗衣被五色光參差熒煌已訝色奪目
柔滑更喜香浮肌天工著意破炎毒故遣佳實生繁滋
旨哉悅口衆所嗜豈聞來去分招麾其他所產亦有取
游女敢自同宮妃我家角東華閨舶勝事屢入騷人辭

有時根拔信宿至風枝露葉殊未衰
雜然紅綠間陳紫
圖牒所在生致之始知河豚與江柱
詩人取譬聊滑稽
賓朋恣食水晶顆殘膏賸馥霑羣兒
年來吏役困奔走
此志不展常低垂輕紅釀白不易得
西風每起尊鱸思
忽蒙傑句警偷懦一洗塵慮忘渴飢
此中滋味甚不薄
吾曹瘠懦當及時揮毫詠物聊復爾
相待莫負平生期
謝毗陵使君惠畫

都尉風流貴公子結交海內知名士
磨礱禁鬻驕侈習

雅意登山與臨水十幅煙江疊嶂圖當時展玩忘朝脯
老仙一顧歎奇絕落筆妙語春華敷此詩千載傳不朽
此畫如今寧復有我来薄宦大江濱無價之珍俄入手
一山雄特倚天立下視羣峯如拱揖斷崖飛出玉虬龍
元氣淋漓鬼神泣山中喬木堪棟梁山外煙波凝翠光
數間野店傍林樾一葉扁舟浮淼茫往時只誦蘓公句
想像都尉圖中趣豈期今日見逼真端與前輩同機杼
自憐老大無他求塵勞羈絆空悠悠安得千巖萬壑裡

尋幽擇勝逍遙游我心欲往足無力縱觀此畫如親歷
毗陵使君真可人嘉惠不啻千金直平生辭受闕鑰嚴
茲焉詎敢傷於廉毗陵萬口皆歸重道義相與吾何嫌

蜀海棠

海棠自是花中傑西蜀此花尤勝絕濯錦江邊艷欲然
浣花溪上繁於纈疇昔聞名未識面對之頓解憂心結
東皇著意欲開時不許芳心輕漏洩風前醉態真嬌媚
雨過啼妝更鮮潔格高不受塵點汙韻勝須那香酷烈

東南顏色豈不佳甲乙品題終少劣我公胸次秋水瑩
海內人人頌清節世間珍玩一物無獨此妖嬈費提絜
墀間堂下不勝春蘋蘋丹唇儼成列嫣然尤物不移人
未害廣平心似鐵幾年隔絕劔閣外拔擢孤忠自明哲
願公持此坐廟堂天下妍媸要區別

挽丞相忠定公

孝皇龍飛策多士宗英第一天顏喜力言萬事實為原
要與邦家立基址堂堂碩望聳中外耿耿丹心貫終始

紹熙之末天步艱忠臣義士肝膽寒元樞扶日上黃道
指顧宗社磐石安億萬生靈疑慮釋轉移愁嘆為欣懽
帝謂忠勞無與並爰立作相專魁柄大開公道延時髦
相與同心究民病區分玉石殊薰蕕賢人得志憮人憂

不堪狂雲巧妬月何意積羽能沈舟

案積羽原本誤作積雨今據史記張

儀傳改正

衡陽道上霜松勁日色慘澹風颼颼行路咨嗟淚

相續興懷安靖恩難酬皇情愴然思舊德辨誣雪謗分
白黑誅鋤元惡氛翳掃昭揭殊勲鼎彝勒由來物理屈

必伸況此柱石真偉人萊公獲譴死海上至今勲績摩
蒼旻中興趙李二人傑亦復身後褒忠純嗟爾讒夫太
無識徒把巧言汙碩德正人摧折不妨榮爾輩羞愧寧
有極蚤知此事悔難追當年詎敢懷姦欺我作此詩慰
忠烈因為人間息邪說

絮齋集卷二十三

欽定四庫全書

絮齋集卷二十四

宋 袁燮 撰

近體詩

渡江

浮天傳自昔萬古一澄清月耿光猶爛風號勢欲傾
滔原不竭漠漠却無聲便欲乘槎去臨風試濯纓

送樓尚書赴詔

聽履辭榮反舊廬高堂燕坐每申如肯隨流俗趨邪徑
要使吾身宅廣居告老未能三閱月趣歸已奉十行書
願公努力扶皇極展盡胸中萬卷餘

和孫吉父登第二首

幾載英名表一鄉今年仙籍始浮香恩隆雲漢頒宸翰
燕賜韶鈞出教坊父子同登尤煒煜詩騷為貺轉鏗鏘
願言努力酬天造勉使吾君冠百王

生平心事渺無涯老去情懷豈復嘉便合扁舟歸故隱

却尋小圃種幽花癡兒僥倖居前列
樸學流傳本故家
第一不宜貪顯宦更煩師友護蘭芽

倚天閣

西川劒閣偉岡巒雖復崢嶸苦未寬
豈意危欄臨楚望
獲瞻喬岳峙江干雌雄並立排鋒刃
紫翠相縈繡悅顰
珍重主人貪好景邀賓攬秀俯林端

和治中雪後

名利那須較有無登臨樂處即吾廬
興濃不覺朔風勁

景好貪看晴雪餘竟日送青娛座客先春解凍躍潛魚
與君不但分風月水色山光總一如

大雪與俞少卿二首

由來臘雪兆年豐新歲還應與臘同可喜三陽纔應律
便看六出驟漫空絨藏犖獸安林下約束遺蝗入地中
積至尺餘猶未已始知嘉政與天通

歎歲隆冬水不冰鈴齋誰與破愁城續紛忽作纖腰舞
照曜俄添老眼明玉不堅牢終可貴花非剪刻自然成

大田來歲應多稼看取倉箱處處盈

寄陳伯耕二首

時郊外賑濟邀伯耕同之偶攝秋官過時不
至以詩督之

風梳雨沐厭馳驅我馬虺隤我僕痛惟有風流髯主簿
才高不肯混泥塗

阡陌周旋約已成妓圍纔合更渝盟宴安有毒君休戀
亟為蒼生決此行

贈毛希元二首

浮世塵勞墮渺茫，真儒器業要韜藏。
誰知寂寞空山裏，修省工夫未易量。

當年罵賊真忠激，今日藏身似隱淪。
抱負如君豈無用，會看膏澤潤斯民。

贈史坑治二首

吾儒根本在修身，恬淡無為樂性真。
此性本無塵可去，去塵猶是未離塵。

公子詞鋒莫敢當更兼世故飽更嘗區區殘寇猶侵侮
願試胸中却敵方

再用前韻二首

乞取刀圭救病身韓公于此枉天真何如夜坐忘軀殼
但有纖毫俱是塵

無味之中味最長東湖居士獨先嘗迺知此藥真良藥
何必求他肘後方

贈陸伯微三首

勝士由來挽不前肯臨高興復翩然浮雲可籥真天馬
應笑駑駘走市塵

斗大書齋以絮名冰壺表裏要清明如今塵土填胸臆
幸挽滄浪為濯纓

自古真才多命薄欣聞同志不長貧堪嗟世道今如許
願為吾君致此身

贈京尹八首

妙年志氣已超然不肯隨羣苟目前才美驟為當世用

青雲直上躡天躔

彈壓工夫妙入神能令晉盜總奔秦盤根錯節游餘刃
奏課當為第一人

儒學當年究指歸服勞王事不言疲遙知今日張京尹
不暇閨房畫婦眉

年纔六十已為卿際會明時蚤顯榮祿厚恩深何以報
惟當努力罄忠誠

吾徒切已無他事萬善根源一片心外若崢嶸中有愧

何殊麋鹿強冠襟

美名疇昔藹循良
重任今茲典浩穰
摯若蒼鷹非不健
何如鸞鳳效嘉祥

前古哲人端可法
遺編遐躅尚堪尋
公餘莫厭頻繙閱
要使胸中廣且深

上醫醫國豈無方
謹論扶持弱必強
屹若中流為砥柱
男兒如此是真剛

與韓撫幹大倫八首

故國由來重世臣
芬芳紫葉鎮如新
中興第一功臣裔
卓犖如君信有人

肯隨流俗慕紛華
閉戶觀書遍五車
器業要為當世用
直須亭蓄渺無涯

等閒援筆賦新篇
句法新奇思涌泉
絕勝唐人作詩苦
推敲一字強雕鐫

幾年慣踏軟紅塵
終日眉攢氣不伸
每到山齋聞好語
令人胸臆便生春

劇談時事言皆驗
籌略知非小丈夫
獨恨人微言不效
未能推挽上亨衢

思君風度心如結
何日從容迭獻酬
涼入郊墟能過我

奉陪童育兩山游

原註天童山阿育王山並在鄞縣東

年幾五十無知己
乘興將為劒閣行
從此與君尤隔絕
興懷疇昔若為情

作詩真欲挽君留
蜀道平寧倚運籌
他日功名成遂後
猶能枉顧絮翁不

和圓通禪老韻三首

浮世營營只自私誰參落葉與枯枝西來面壁原無語
却費圓通幾首詩

新詩的皦綴明璣道行清通照碧溪塵絆無因到蘭若
聊將兩絕當留題

贈天童監寺

平生樸拙本無奇珍重高人不我遺自顧原無一滴水

何能復有兩篇詩

原註楊誠齋詩歸來大眾
空歡喜只有誠齋兩首詩

贈卜道人二首

道人徧閱世間人，休咎先知若有神。
多少媼妍歸藻鑑，祇緣唐許是前身。

道人怪我年如許，宿債胡為未盡償。
寧識吾心烈於火，得歸林下便清涼。

郊外即事七首

春風簸雨濕郊原，春水沄沄復舊痕。
寂寞道傍堪歎處，柴門茅屋數家村。

舟中無事閱陳編千古高風挹聖賢奔走徒勞竟何補
興懷舊隱思淒然

雨聲初斷暮雲橫天意欲晴猶未晴好向長空施巨手
掃除氛翳見清明

清香忽向暗中來應為梅花取次開愛汝風標真絕俗
何當環繞百千迴

幾處汪汪成巨浸傳聞昔日盡良田興除利害寧無策
忍把膏腴久棄捐

陰雲解駁晴光好
藜杖逍遙足自怡
月色漸遲風力細
初春便是浴沂時

乍從塵土俯澄泓
瑩徹心神眼倍明
天下淵泉有如此
流清端的自源清

遊靈山二首

何人題作一靈山
千古佳名不可刊
欲識此聲非浪得
試于高處一憑欄

湖山秀美冠東南
汎此山椒枕碧潭
眼界寬平無限景

箇中好處不容參

雨中度東湖

宿靄埋山未肯收
晚風吹雨濕衣裘
漁舸一葉烟波裏
添我胸中萬斛愁

望東湖五首

澄泓萬頃浸冰輪
千尺驚看玉塔新
滿目輝光相照耀
乾坤何處不精神

天上金波印水心
心中波浪亦成金
小舟蕩漾金波裏

陡覺廣寒宮殿深

世故紛紛賺白頭何如良夜一扁舟
霜風拂面心神肅塵慮寧容一髮留

五十頽然一秃翁湖山清興渺無窮
扁舟欲學鷗夷子未有平吳霸越功

世上功名姑置之微茫心事要深思
水光月色精神好長使襟懷似此時

又二首

重巒疊嶂巧縈紆中有汪汪萬頃湖山色水光相映發
清輝含處妙難摹

平生酷愛水浮天每到東湖意豁然要識此湖功利溥
早時無限蔭民田

天童道上二首

峩峩巖巖太白峯高名千古獨稱雄放懷擬向山頭立
宇宙都歸一望中

太白峯前三十里古松夾道奏竽笙清輝秀色交相映

未羨山陰道上行

登塔二首

塵俗區區咫尺間
著身高處眇人寰
平生望塔今登塔
聊向風前一解顏

遠望巍峩聳百尋
今朝特達快登臨
最高未是真高處
無盡應須更盡心

百步共

一山屹立萬山朝
壯觀稜稜倚碧霄
惆悵故交埋玉處

高名千古共峇峽

原註故交謂沈國錄也沈
華象坎在百步坎之下

山中

古松奇石水潺潺小小茅庵一兩間
野性自知難適俗山林僻處且偷閒

山居二首

舍北巔岼萬疊青門前列岫巧相迎
天公有意憐寒士錫與公侯百雉城

城居未免囂塵役野處閒觀德性初
究竟孰為清與濁

此心安處即吾廬

和姜子謙遊晁景迂祠

百年風節仰英遊喜見新詩為點頭微詆大賢雖可恨

不妨千載略同流

原註景迂先生大節不愧古人獨于孟氏有疑令人怏怏雖然此景迂之

見也與夫世之隨聲是非不自己出者固有間矣剛大之氣老而彌篤不以榮辱得喪動其心有孟氏之風焉故予表而出之

題景范堂

曾子才高事事能就中一事最堪稱前賢拯救蒼生意

賴有斯人解服膺

書先塋二首

我卜山岡畝百金家貧自嘆力難任
杉松盡是親栽植
寄與樵人念此心

杖藜數數款松關
豈為多情酷愛山
痛念慈顏隔泉壤
此心那得片時間

覽鏡二首

朝來覽鏡一何哀
髮禿容枯半白髭
老態侵尋光景促

著鞭從此勿遲遲

工夫一日不專精
面目塵埃已可憎
何必鑑人明得失
青銅相對即良朋

聞鶯

春曉園禽百族鳴
未知黃鳥可人心
閒中靜聽絲蠻語
絕勝歌喉耍眇音

觀魚

波清日暖足優游
去去來來總自由
只為貪心除未得

竟隨香餌上金鉤

桔槔

誰作機關巧且便
十尋繞指汲清泉
往來濟物非無用
俯仰由人亦可憐

織婦

列屋閒居曳綺羅
霜刀裁剪競新磨
那知紅女經營苦
輒輒寒機幾萬梭

梅雨

江鄉梅熟雨如傾茅屋低頭困鬱蒸小小悶人人莫厭
解教禾稼勃然興

秋霽

怪底中秋尚鬱蒸滂沱三日勢如傾今朝雨霽新涼入
始信清秋本自清

霜

肅肅嚴威不可干劍鉞莫作等閒看丈夫砥礪平生節
到此孤忠激肺肝

新月二首

昨夜璇霄素魄淪一痕初復便精神輝光萬里從茲始
今夕端倪即是真

至精那得久沈淪造化回環自有神滿意只須三五夜
十分全體見天真

霜月

霜氣橫空月色明寒侵肌骨不勝清支筇忍凍遊山徑
胸次都無世俗情

山月

好風吹雨到山前
月與山翁故有緣
靜夜相看兩寥寂
水流砧下瀉潺潺

冬至二首

朝來雲物效嘉祥
和氣初萌日漸長
相慶紛紛緣底事
由來人道貴陽剛

陽剛初復一何微
萬彙亨嘉肇此時
只此胚胎須護惜
要教宇宙總熙熙

冬日

茅簷窮臘負朝暾不羨紅爐獸炭溫始信太陽和氣別
擬將此味獻金門

和東林湛堂禪師喜雪韻五首

去歲寒雲久積陰四郊雪片臘中深今年一稔民安業
老守區區慰此心

祈禱精誠覬上通嘉祥未與去年同老懷日夜憂無奈
安得寒花屢舞風

恨無佳政布民間賦斂猶繁獄未寬來歲若非禾稼熟
窮檐何以免饑寒

皇皇有若救頭然為計無聊只籲天殲厥遺蝗須尺瑞
由來積玉兆豐年

寂寞東林一老禪殷勤念我惠佳篇敢煩見在慈悲佛
為我投誠過去僊

玉簪

琉璃為葉玉為葩妙質天然不汝瑕精彩照人香絕俗

遺簪端的自仙家

紫薇花二首

蒙茸曲經紫薇花
幾載藤蘿巧蔽遮
暫借斧斤還舊觀
依前萬葉吐新葩

紫薇花對紫薇郎
何事齋前一樹芳
造物似教人努力
他年準擬侍君王

芙蓉

淺深紅穗遠汀洲
笑舞西風體力柔
雅意陂塘非玩物

令人却憶蓼花遊

久不見竹堂高篇輒以湘蓴索之兩詩繼至因

用其韻

壺中老子興不淺豐頗樽前勝玉梅肯為蓴羹下犀箸
聊憑催促好詩來

往時賸喜親標格今日無因款話言兀坐書齋飽蔬食
想公飲客厭熊蹯

詠凌霄花

松柏扳援有女蘿紅英亦復蔓高柯侵尋縱上雲霄去
究竟依憑未足多

拒霜花

誰將名字強稱揚弱質區區敢傲霜霜隕葉枯紅粉落
元來槎也未為剛

園蔬六首

攜鋤抱甕不辭勞要使霜根足土膏我去艱難生理窄
卻疑學圃屬吾曹

白菰肥脆真佳品紫芥蒙茸亦可人環舍滿畦多且旨
寒儒專享未為貧

深林十月飽清霜寒氣侵凌味轉長世上甘腴有如此
擬排闥闥獻君王

良朋過我食無魚茅屋相尋只如蔬莫道藜羹滋味薄
要知瓜祭必齊如

朱門終日飫甘肥綺繡盤筵鱠縷飛寧識山林枯槁士
清風千古首陽薇

輦羶屏去忽三年筋力扶持老尚堅所養固知先大體
人生何苦嗜肥鮮

黃葉

黃葉紛紛舞勁風反膏收液歲成功明年滿眼春容好
卻在今時索寞中

詠橘

風勁霜清木落時金丸粲粲壓枝垂貧家不作千奴計
一樹庭前也自奇

謝王恭父惠石巖花二首

巖畔移來漫一叢
鮮鮮忽發十分紅
細看頗與醜明類
言善方知美在中

生平惆悵了無華
投老胡為也愛花
家釀朋壺助清興
會看落筆吐天葩

梅花四首

百卉芳菲二月時
先春梅萼著疎枝
只緣姑射風姿別
不怕寒威損玉肌

清香妙質總宜人老幹青枝更絕塵
徹骨風流真我友竹籬茅屋故相親

寒花得水或成仙體素含香亦可憐
韶嫩有餘清不足此花獨步信無前

其間妙處不容評玉潔冰清亦強名
要識此花高絕處解成佳實作和羹

病起見梅花有感四首

不費春工巧剪裁自然精彩粲瓊瑰
也知受命如松柏

故向隆冬取次開

霜月交輝色愈明風標高節聖之清諦觀毫髮無遺恨
始信名花集大成

古澗荒郊人迹少幾枝摘索為誰芳因思陋巷甘岑寂
為已工夫味更長

病餘百念不關心偶見幽芳只自驚世故紛紛易湮沒
會須借此滌塵襟

臘梅

金相玉質舊同科
暗裏清香萬斛多
絕俗風流寧不似
調羹功用竟如何


小松二首

瑣瑣新松雜穉杉
青青數寸倚巖岩
牛岡自有神呵護
未怕林間走鹿饒

初栽準擬雨如膏
無奈晴暄思鬱陶
造物見憐甘澤霈
倚天會見百尋高

咏竹

此君林下靜無塵
苗裔生來便逸羣
頭角嶄然圓玉峙
養成直節要凌雲



繫齋集卷二十四

絜齋集後序

渾然天成者有道有德之言也道德不足言辭雖工所
為天者已不全矣君子奚尚焉我先君子之屬辭也吐
自胷中若不雕鐫而明潔如星河粹潤如金玉真所謂
渾然天成者乎先君子自言兒時讀書一再過即成誦
精神純固無寒暑晝夜之隔及壯寢多不寐凡所著述
率成枕上至暮年亦然記覽甚博淳蓄日富然未嘗襲
人畦迕尤不喜用難字每誦先聖之言曰辭達而已矣

立朝抗疏懇惻忠愛不為矯激至其指事力陳略無回撓入侍經幄講讀從容每援古誼以證時務啓沃之功良多訓誘後進開明本心一言一字的切昭白聞者感動其他論著多有補於世教凡矜夸粉飾峭刻奇險之語一無有焉非全於天而能若是乎嗚呼先君子往矣遺編猶在不肖孤不能窺其彷彿又安能擬諸形容惟是散落人間兄弟相與哀輯尚多闕略姑取其已彙次者刻梓以惠後學俾知有道有德之言渾然天成蓋若

此不肖孤倘未即死庶幾旦旦熟復以自警云紹定初
元八月既望男朝奉郎權知衢州軍州兼管內勸農事

甫拜手謹書

